

# Plumalhon

Abril de 2000

Nº 41

Reportatge,  
p. 8



MAINATGES  
D'ÒC


Conte, p. 18




Joan Jaurés,  
p. 4



Reportatge, p. 14



35 F (5,34 €)



# Marèa negra

**Quand los ròcs ploran  
lagremes de petròli.**

**Al mes de decembre de 1999, la  
tempèsta asclèt lo petrolièr Erika,  
que s'aprefondiguèt en daissant  
s'escampar un quinzenat de milers  
de tonas de fiol.**



Èra lo començament d'una marèa negra que toquèt las còstas uèch jorns après lo naufragi del batèl.

Mai de 400 quilomètres de còsta foguèron embrutidas de petròli.

Quand la marèa monta, la mar carreja una granda quantitat de petròli. Aquela fanga acapta los ròcs e lo sable de las platjas, empresona los aucèls que i demòran e tot çò que i camina.

Estelas de mar, crancs, ustras, aucèls, res i pòt pas escapar. I son totes empegats.

Aquela forma empastissada de petròli, es un cranc.

A boca de nuèch, aquela musaranha es sortida sus la plaja per s'avitalhar, mas, malastre, lo petròli l'a agantada, ela tanben.

Las primières victimas de la marèa negra son estats los aucèls de mar. Acostumats de se pausar sus l'aiga, o de i cabussar per atrapar lo peis, son estats clavelats e pegats sus plaça. I son mòrts de lassière.



Se pòt estimar que 100 000, 200 000 o benlèu 300 000 aucèls son mòrts a causa d'aquela catastròfa.

D'aucèls son estats trobats e reculhits qu'èran vius encara.

Sus las plajas, los voluntaris començan de netejar lo petròli pegat a la rocalha mentre que d'autres amassan los aucèls mòrts e los meton dins de sacs. Los vius, recuperats dins de cartons, los fan partir dins de centres ont seràn sonhats.



D'en primièr, los aucèls son picats, lor injèctan de fèrre, de vitaminas e d'antibiotics. Puèi los noirisson amb una menèstra facha amb de peis.

Un còp requinquilhats e repausats, los fan passar dins una maquina de lavar estudiada per netejar los aucèls.



Mai de 10 000 aucèls son estats portats al centre per èsser sonhats. En despièch de totes las precaucions, fòrça aucèls son mòrts d'ància, de paur e d'aver engolat de petròli tanben.



Ara, caldrà esperar fòrças annadas abans que se restablisca l'equilibri ecologic sus las còstas embrutidas e polluïdas de petròli...



Tèxte e fotos  
Frederic Lavaïl

Se pensa que lo 30 % dels aucèls seràn estats sauvats, coma aquell guilhemòt, tot net, que demorèt un parelh de meses al centre veterinari abans d'èsser deslargat dins l'ocean, en santat tornarmai.